

秘本醫學叢書

袁庆元輯

裘慶元輯

秘本醫學叢書

(五)

上海書店

伏邪新書

伏邪新書提要

粵稽古今載錄治六淫新感者法賅理盡治六淫伏邪者略焉不詳是以臨證之醫辨別未易清楚天枉者多矣本書亦爲劉吉人故社友之遺著分伏燥伏寒伏風伏濕伏暑伏熱而列論六氣伏邪條分縷晰事事皆從實驗中得來開後學無數法門洵謂發古人未發之旨立古人未立之法不特嘉惠醫林抑亦澤及病黎先人特別見解筆之於書吾儕現成獲讀何幸如之

伏邪新書序

伏邪爲病前人未有特筆暢明言之凡近世醫生所謂調理本症是也以其病持久而徐變動不速奏效不易故也其實內有伏邪爲病者十居六七其自生之病不兼內伏六淫者十僅三四前人未嘗分別著書立說以故伏邪與本臟生病皆所混雜不分而總以調理本症目之以金匱與和劑局方等之古法治之僅按其外面自現症候名目用方按圖索驥有效有不效總未得究其病根之法分別用方在本臟自生之病或有對症之理在伏邪爲病之症不知祛邪外出之法故鮮能收功予經歷多年覺本臟自生病不兼伏邪者用古法治可以奏效若兼伏邪即難應手一遇全因伏邪爲病而累及本臟自病者更無全愈之日矣俗人徒以試藥戲藥目之以爲病不可治而予創立伏邪說治法分別六淫治之一面扶正一而祛邪不操切圖功務使內伏之邪氣外解臟

腑之真元復舊而後已念年以來獲效甚夥於心甚安不敢自秘爲獨得之奇願以公諸後世非予敢獨創爲異說也以內經有春傷於風夏爲飧泄等論吳氏葉氏已先開伏暑法門予因隅反覺六氣皆有內伏爲病者故條分縷晰六氣伏邪分別診治法以告後學蓋邪機隱伏病根深藏非若新感易於辨識易於祛除也

著者識

秘本醫學叢書第五冊目錄

伏邪新書

溫證指歸

醫中一得

鬼遺方

女科折衷纂要

醫學說約

醫醫醫

延陵弟子紀要

醫學妙諦

察病指南

過庭錄存

伏邪新書

鎮江劉吉人遺著

紹興裘吉生校刊

伏邪病名解

感六淫而即發病者輕者謂之傷重者謂之中感六淫而不即病過後方發者總謂之曰伏邪已發者而治不得法病情隱伏亦謂之曰伏邪有初感治不得法正氣內傷邪氣內陷暫時假愈後仍復作者亦謂之曰伏邪有已發治愈而未能除盡病根遺邪內伏後又復發亦謂之曰伏邪夫伏邪有伏燥有伏寒有伏風有伏濕有伏暑有伏熱

伏燥

其面色如常但中正印堂年壽兩顴等處間有白氣隱於皮膚之裏白而不澤

舌苔白腐（白如銀灰色亦有黃白相間者如表心紙色而厚）甚則僅如錢大一塊在舌中心而四面如駁去者或四面有白腐而中心如挖去者脈象沉取短濇浮取反覺小滑（兼勝氣者脈兼緊左右彈兼勝復氣者脈兼大數）胃脘不舒（中氣故覺痞悶也）此伏燥常見之形症也

燥金邪氣伏於陽明發爲嘔吐翻胃當胸脘痛腸結（內有燥屎如羊矢豆內結而大便反溏泄或細如金菓條或滯下）滯下（大便不爽痛而不通之候）噎膈（俗傳膈食病皆由燥屎而成紫虛四言脈訣有翻胃嘔吐結腸者亡之論予以燥結下之無不生者）無汗或但頭汗出（無汗燥傷津液也但頭汗出者頭屬陽明部也）加減調胃承氣湯主之去芒硝加蘇子歸身淡苳蓉火麻仁潤以下之法也

燥金邪氣伏於陽明日久不解傳入衝任發爲當臍而痛（時作時止時緊時

鬆）疝瘕癥結脫營血枯久則成乾血癆症（乾血癆本世俗之俗名然惟此一症名實相符）治如上法加桃仁蘇木烏賊骨杏仁蘇子蘇梗以通之此寓補於通之法（桃仁蘇木烏賊骨溫通活血而不傷氣杏仁蘇子蘇梗少用之以爲助以調氣降氣生甘草稍亦能通下）日久虛甚者參用通補丸奇經丸脈結而牢緊者天台烏藥散加巴霜法亦可參用

燥金邪氣伏於兩厥陰血分（肝與胞絡皆主血）兼及衝任男子虛疝血虛之人日漸瘦弱嗆咳寒熱似癆少腹拘急似痛非痛脇下疝痛（如帶束腰際狀者帶脉亦病）大肉削脫（津液消亡也）脈芤虛短濇者當歸羊肉湯主之（用歸身一錢連皮羊肉三斤白煨另煎加入食羹獨用亦可）補血潤燥之法也女子月事正盛及男子血不虛者燥氣縛血結成瘰母痞塊癥瘕腹脹痛者化癥回生丹主之虛者（人虛症實）通補奇經丸參用（人虛症實故用通補

兼施法

燥金邪氣伏於手太陰肺絡發爲肺痿皮毛枯津液槁噎咳咯血天府穴痛胸痛如夾末化熱者

紫蘇子湯主之方用（杏仁玉竹柏子仁生甘草蘇子火麻仁阿膠）化熱者（脉數大兼芤）潤燥救肺湯主之（即喻氏清燥救肺湯去桑白皮加萸仁）

燥金邪氣伏於陽明傳入足太陰脾絡少腹兩旁夾臍而痛甚不能直身如伸直則脾之大絡拘急而痛更甚大便秘細若金菓條亦有羊屎矢豆糞在內者五仁丸主之 脾約麻仁丸亦可參用（此條當與前陽明法參用）

燥金勝氣陽虛不旺者感之頗似寒症（以其脈緊濇而小舌白無汗形類傷寒）用散寒藥則化熱（脈變小數口渴睛紅等證）用清涼藥則又似寒（脉又變小緊而濇緩細結等陰象口中生水此甘寒藥之弊也）用苦寒藥（如芩蓮

知柏之屬萋貝山梔等類）則益燥而血液乾元氣減用溫補（如黃芪潞黨蒼朮）則中宮壅塞不通用消導化痰藥（如陳皮半夏厚朴山查神麴雞內金等）則規傷胃陰（胃汁津液反壅塞於胃之上脘不降口生涎沫燥極反澤矣）燥結愈堅（胃汁燥乾腸中無津液滑潤則燥屎愈加堅結難下矣）兼勝氣爲次寒爲清邪當溫攻潤下之者誤用寒下法必變生厥冷肢逆汗出如水陽氣旺者易化爲火（即燥金復氣也脈數有力舌黃）化熱卽從火熱治之故燥氣化火之症易治（人人能識人人能治但在化而不化脉象方數舌色初黃之候誤用苦寒則難治矣）

按燥金之症與七情抑鬱悲憂思症相似以其同爲秋氣傷人治法皆以春和生發之氣解之（脈同一濇脈而有長短浮沉之異燥傷血故脈沉而短憂鬱生於七情不適善傷氣故脈浮濇而長細金性沉着堅斂易生燥屎憂

鬱則無之故憂鬱用蘇梗製香附溫和行氣舒暢氣機伏燥用蘇子杏仁歸身有油有汁之品溫潤血液）而一由六淫燥氣內伏一由七情抑鬱而生學者當攷其同中之異分別用藥以施治焉又按燥極反澤口生涎沫與熱邪入營口反不渴津唾多胃熱則廉泉開症相似（熱症舌質多紅紫苔薄白如雪青杭綢色燥症舌色不甚紅紫少有分別）而熱症可清燥症不可清也至於熱症末傳陰液大傷脈反小瀉燥症陰傷脈亦小瀉（熱症小瀉然靜中有動多扞瀉相兼者燥症以瀉爲本脈其人形症未久未大傷陰津即有瀉脈一爲末傳敗象一爲初中傳本脉病之久暫深淺其候不同亦易變也）學者亦當細心分別焉蓋燥卽乾也一則是西風吹乾一則是火氣炕乾其耗傷津液則同一乾燥而治法則大有不同一宜清潤甘寒而潤（火燥治法也）一則宜溫和甘平而潤（燥金治法也）

伏寒

其人面色淡黑而黃（如浮烟籠罩黃黑皮裏有青白氣隱隱現於年壽山根額上兩顴臥蠶等處）爪甲色淡不甚紅（微兼青白）舌苔薄白（如數米飲如染豆漿）而潤舌質淡（不甚紅）脈沉遲弦細而弱痛者兼緊痛甚則如新張弓弦或兼結食不甚消（有食入半日而吐出仍未腐化者）行動言語皆遲緩神氣消索小便清長此伏寒常見之形證也

寒邪伏於足陽明經傷胃之陽氣胃汁冷發爲胃寒飲食不消胸悶脘脹（胃汁冷陽氣困故消化不速而有是症）吐水（津液不消陽氣不足脾不消水液也）甚則腰以下如坐冷水中（胃陽不足腎陽亦憊也）喜熱惡寒（此寒從胸受或從足背受者故無傷寒表症）治以甘溫溫中散寒湯主之（乾薑砂仁附片甘草蔻仁苓朮）加灸足三里胃脘中脘畏灸者以蒜泥代灸法或

散陰膏貼中脘穴

寒邪伏於手陽明手太陽經發爲腸癖白痢五更冷瀉（瀉色白臭腥淡）少腹痛有定處綿綿不已非得熱熨不能解也白芷乾薑湯主之（白芷桂枝破故紙乾薑茯苓甘草萊菔子）灸二腸俞散陰膏貼臍貼大小腸俞穴

寒邪伏於足三陰經（肝脾腎三陰經由足心臍腹而受）發爲少腹痛爲奔豚氣氣上冲痛（兼衝任脈病）爲伏梁（任脉病也）爲寒疝（厥少陰衝任病）爲足筋拘攣（陰蹻病也）膝冷脛痠（腎病也）感寒即發者溫暖三陰湯主之（吳萸木香乾薑肉桂附片甘草）疝者加荔枝核橘核元胡索足筋拘攣者加（五加皮虎骨膠木瓜灸三陰交湧泉穴散陰膏貼之亦可畏灸者以炒鹽填臍中上加薑片灸之不傷皮肉火氣緩緩入腹灸一火急按之使火入腹爲補火法

寒邪伏於手太陰肺輕咳喘甚則哮喘吐寒飲白沫（白沫如水不黏不能引絲有絲亦易斷）感寒即發輕者蘇杏二陳湯主之重者麻黃湯兼足三陰症仲聖小青龍湯麻黃附子細辛湯苓桂朮甘湯選用（兩太陰脈虛緩而遲弦按之滑者兼濕痰水飲症也故用苓桂朮甘湯實土以制水也）灸肺俞穴或散陰膏貼（天府肺俞穴亦可）

寒邪伏於衝任二脈女子天癸後期短縮而少少腹腠紋際痠痛子宮虛寒血凝經閉則爲癥結血蠱（女子天癸適至衝任二脈虛或食冷或下部受寒每多致此）仲聖桃仁承氣湯主之生化湯亦可主之子宮虛寒者寧坤丸癥結者化癥回生丹

寒本水氣靜順之化其氣凝冽故有冰凝之患人之血液也得寒則冰凝水液反少不比濕邪水液反多也其感寒而水飲停蓄爲吐水喘哮喘痰飲之症者非

其人陰液有餘即犯滋潤之弊故經文曰寒淫於內治以甘熱佐以甘辛良以陰液少者感寒則易化爲燥也（甘屬土以土尅水用甘者亦勝制之義也甘辛發散屬陽以舒陽氣而化爲汗也）陽氣旺者易化熱（用甘以潤保護津液使陽氣舒和運津液而爲汗使寒從汗解由皮毛而出無化熱之弊也）內經冬傷於寒春必病溫此寒猶伏在皮毛腠理其人陽氣旺陽鬱久而化爲溫熱也（世醫讀王氏經緯故只知寒化熱爲伏邪而不知有六淫本氣伏於內從內而發之伏邪矣此篇故不得不作也）化燥者參用燥金治法化熱者參用伏熱治法有其人陽氣不足陰液有餘則自始至終爲寒氣不化燥熱而水液不消與濕氣合而爲寒痰水飲之症者參用濕邪治法（脉沉遲而滑者陰液有餘可用溫燥沉遲而濇者陰液不足不可燥則以甘辛溫法治之）

按伏寒脉症頗與七情憂鬱思慮相似（蓋思則脈多沉遲甚則結者憂鬱